

Amore : questo sconosciuto

di Valentina Lucia Iorio Tomasetti
Categoria C (Adulti)

Gh'era ona cà, quan séri pinina,
listéss a chéla da la mè nona,
finestri e porta, lòbbia e la vigna,
anca la sôsta, tütt d'ona dona,
m'è restaa in co, l'è propi véro
che la gh'era on gatin negro.

A `na cert'ora la gniva föra
par naa a netaa el so giardin
da là da la strada , zapin e shcôa,
in spala o in brash el so gatin.
Ô la shpeciava fin ch'l'era finiid,
el so piaséé, domà chel respiir.

Dopo quei temp, finida l'estaa,
a s'è sentiit on'auto frenaa,
on bacanéri, füm da crepaa:
el micio négro mort shpatashaat.

E sota el sôô, polvera e gèra
la pora Luce con in man el gatin,
la piangéva i lagrim da la tèra
da paar lée in facia a on crétin.

Ô vosava, lüü ô gh'era reson:
-G'ho da naa, som foort, som on om,
mia paar nient ho sonaat i tromb.-
A chi temp là, girava inshì el mond.
-Mi som mi- pöö ô diséva queicoss
e a lée ga créséva i singiozz,
-L'è stai aposta che t'è sonaad
par fàl stremii, par fàmal shcapaa,
t's'è nai püséé fort par ciapàl sota
g'ho piü nagott, som bèl'e biota.-

A som nàia a trovaa la Carmèla
che la cognoss tücc chi da Lodrin,
se la gh'è ammò, se l'è sota tèra
la pora Luce col so gatin.
-L'è morta d'on pèzz, l'è già da tanto

arént a la crôôs gh'è el calicanto.-

A cercaa la Luce in cimitéri
imbésüida, föra de co,
tra crôôs, candéll, làpid e ceri,
in da sto mond séri propi no.

Quan m'è parüüd ch'a l'eri trovada
ho sentii queicoss sü la canvèla,
come on soshpiir, ona bofada,
on soia par mì fin dré la mashèla.

Ma som incrüshada, ma paar no véro,
el gatin da la Luce, on robin négro.